

Staðfesting konungs á skipulagsskrá fyrir „Utanfarasjóð Austur-Skaftfellinga“, 122
 útgefin á venjulegan hátt að mandatum 2. desember 1938 af dóms- og kirkjumála- 2. des.
 ráðherra.

Skipulagsskráin er þannig:

SKIPULAGSSKRÁ

fyrir náms- og utanfarasjóð Austur-Skaftfellinga.

1. gr.

Sjóðurinn er stofnaður af gjöf Jóns Ívarssonar kaupfélagsstjóra og konu hans Guðriðar Jónsdóttur. Hann er sem stendur til ávöxtunar í innlánsdeild Kaupfélags Austur-Skaftfellinga, Höfn á Hornafirði, og nemur kr. 2981,67 — tvö þúsund níu hundruð áttatíu og einni krónu og 67/100 — hinn fyrsta dag janúarmánaðar 1938.

Sjóðurinn er sjálfseignarstofnun, sem fara skal með eftir reglum, er settar eru með skipulagsskrá þessari, og vera íbúum Austur-Skaftafellssýslu til nota.

2. gr.

Sjóðnum stjórna 3 menn, sem valdir skulu þannig: Sýslunefnd Austur-Skaftafellssýslu og Kaupfélag Austur-Skaftfellinga kjósa sinn manninn hvort, á aðalfundum sínum. Hinn þriðji, sem er formaður stjórnarinnar, velur gefandi sjálfur, meðan hann er á lífi, en að honum látnum skulu fastir starfsmenn Kaupfélags Austur-Skaftfellinga velja hann. Kjörtími stjórnarinnar er fimm ár, og skal hin fyrsta stjórn vera fullskipuð sumarið 1938.

3. gr.

Ef Kaupfélag Austur-Skaftfellinga hættir störfum og önnur samskonar stofnun tekur ekki við starfsemi þess, skal sýslunefnd kjósa alla stjórnina, og velur hún sér þá sjálf formann.

4. gr.

Sjóðsstjórnin skal ávaxta sjóðinn sem bezt, annaðhvort með því að kaupa fyrir hann ríkistryggð skuldabréf eða láta hann ávaxtast á annan hátt hjá banka, Söfnunarsjóði eða annari fjárhagslega öruggri stofnun í landinu. Árlega skal stjórnin gera skilagrein um sjóðinn og senda sýslunefnd, sem hefir yfirskoðun hans á hendi, svo og Kaupfélagi Austur-Skaftfellinga og gefanda eða þeim, er kemur í hans stað, eitt eintak hverjum, ásamt nánari greinargerð, þegar veitt hefir verið fé úr sjóðnum.

5. gr.

Af vöxtum sjóðsins skal verja tveim þriðju hlutum fimmta hvert ár — í fyrsta sinn í byrjun árs 1942 — til þess að styrkja einn eða tvo efnilega menn úr Austur-Skaftafellssýslu til utanfarar í náms- eða kynningarerindum, eftir nánari ákvörðun sjóðsstjórnarinnar.

Hinn hluti vaxtanna bætist við stofnfé sjóðsins, jafnótt og þeir falla til. Ef ekki er, vegna einhverra ástæðna, veitt úr sjóðnum á hinum tilteknu tímum, bætist það, sem veita mátti, við sjóðinn.

6. gr.

Stjórnin skal auglýsa í öllum hreppum Austur-Skaftafellssýslu sex mánuðum áður en styrkur er veittur, hvenær og hve mikið fé verði fyrir hendi til styrkveitinga

- 122 úr sjóðnum og tiltaka umsóknarfrest. Styrkveiting skal ákveðin í byrjun þess árs, 2. des. þegar nota á styrkinn. Skal styrkveitingu svo hagað, að í fyrsta skipti fær styrk starfsmaður Kaupfélags Austur-Skaftfellinga, í annað sinn bóndi úr sýslunni, eða annar maður eða kona, sem landbúnað stunda og líkleg eru til þess að stunda þann atvinnuveg áfram, og í þriðja sinn sjómaður eða verkamaður eða verkakona, sem einnig eru heimilisföst og starfandi í Austur-Skaftafellssýslu. Síðan skal veita styrk þessum aðiljum í sömu röð áfram, er næst kemur til styrkveitingar, en engum nema einu sinni, og skipta má styrk milli tveggja sama árið. Ef ekki koma umsóknir frá þeim aðiljum, sem nefndir voru, má stjórnin veita styrk í annari röð.

7. gr.

Styrkinn skal nota til náms og utanfara, bæði til greiðslu ferðakostnaðar og dvalar erlendis í nágrannalöndunum, einkum á Norðurlöndum. Skulu styrkþegar dvelja þar nokkurn tíma og kynnast þar af eigin reynd þeim greinum atvinnu sinnar, sem þeir óska og sem verða má til gagns við störf þeirra heima í héraði á eftir. Styrkþegar skulu að jafnaði kosta ferðir sínar og nám erlendis með ekki minna fé en styrknum nemur og eiga að gera skýrslu um ferð sína eftir heimkomuna og senda sjóðsstjórninni.

8. gr.

Þegar sjóðurinn hefir aukizt svo, að árlegir vextir hans nema eins miklu að verðgildi og fimm ára vextir nú, skal veita styrkinn annaðhvert ár eftir sömu reglum og áður.

9. gr.

Leita skal konunglegrar staðfestingar á skipulagsskrá fyrir sjóðinn.

123

25. nóv.

REGLUGERÐ

um tollheimtu og tolleftirlit.

I. KAFLI

Tollumdæmin.

1. gr.

Landið skiptist í 24 tollumdæmi, og eru þau þessi:

1. Reykjavíkurtollumdæmi. Verzlunarstaðurinn Viðey heyrir að öllu leyti undir Reykjavíkurtollumdæmi um tollgæzlu.
2. Akranestollumdæmi. Það tekur yfir Ytri-Akraneshrepp.
3. Mýra- og Borgarfjarðartollumdæmi. Það tekur yfir Mýra- og Borgarfjarðarsýslu, að undanteknum Ytri-Akraneshreppi.
4. Snæfellsness- og Hnappadalstollumdæmi. Það tekur yfir Snæfellsness- og Hnappadalssýslu.
5. Dalatollumdæmi. Það tekur yfir Dalasýslu.
6. Barðastrandartollumdæmi. Það tekur yfir Barðastrandarsýslu.
7. Bolungavíkurtollumdæmi. Það tekur yfir Hólshrepp.
8. Ísafjarðartollumdæmi. Það tekur yfir Ísafjarðarkaupstað og Ísafjarðarsýslu, að undanteknum Hólshreppi.
9. Strandatollumdæmi. Það tekur yfir Strandasýslu.